



REPÚBLICA DEMOCRÁTICA DE TIMOR-LESTE

GABINETE DO PRIMEIRO-MINISTRO

ALOKUSAUN

SUA EXELÊNCIA PRIMEIRU-MINISTRU

KAY RALA XANANA GUSMÃO NIAN

**IHA OKAZIAUN LANSAMENTU KONSULTA PÚBLIKA KONA-BA
ANTEPROJEKTU LEI NE'EBÉ ESTABELESE LEI REJIME ESPÉSIAL BA
DEFINISAUN TITULARIDADE BA BEINS IMÓVEIS (LEI DE TERRAS)**

**Salaun Madres Canossianas, Becora
Dili, 12 Juñu 2009**

Exselênsias,
Señoras no Señores,

Ho laran haksolok no neon metin mak ha'u fó hatene ba ema hotu katak ohin hahú ona prosesu konsulta públika kona-ba Anteprojetu Lei ne'ebé estabese Rejime Espesial kona-ba Definisauun Titularidade ba Beins Imóveis (Lei de Terras ka Lei kona-ba Rai). Bainhira aprova ona, mak ba primeira vez Lei ne'e bele permite rekonhesimentu formál kona-ba direitus propriedade ba rai iha Repúblika Demokrátika Timór-Leste, lori fó konsteúdu prátiiku ba preseitu ka regra konstitusionál ne'ebé garante direitu propriedade ba sidadaun nasional tomak.

Relasaun povu ho rai hanesan baze ba ita nia kultura, ita nia orijen ka hún no ba ita nia destinu. Durante sékulus ka tinan atus-ba-atus laran, direitu propriedade ba ita nia rain rasik, nasoens estranjeirus ka ema rai seluk mak determina fali no, hahú Restauraun Independênsia, mak povu Timór-oan tomak hein katak bele rezolve ona situasaun ida ne'ebé seidak defini loloos ne'e, ne'ebé mai kedas husi tempu kolonializmu.

Famílias no comunidades tomak ema obriga atu soe hal sira nia aldeias ka knua no suku ne'ebé sira moris no hela fatin bá hodi hahú moris fali iha fatin seluk iha ita nia Rain ne'e. Direitus formais oioin ne'ebé kahur ba mai husi kedas tempu Portugêz no tempu Indonézia, no mós obriga tan populasoens ba hela iha fatin seluk iha Rai laran, husik hela ba Timór independente legadu ka eransa ida ke konfuzu tebes iha sektór propriedades. Servisu todan no sensível tebes atu rezolve situasaun ida ke kompleksa hanesan ne'e, tanba presiza aten-barani husi parte Governu no pasiênsia boot husi sidadauns hotu-hotu. Iha esperansa boot ne'ebé kahur ho laran ta'uk no ansi hosi partes hotu-hotu.

Governu ne'e hanoin katak labele dada naruk ba beibeik rezolusaun kona-ba kestaun ida ne'e. Enkuantu la defini didi'ak kona-ba direitus propriedade mak sei benefisia ka halo di'ak de'it ba ema riku no poderozus ka kbiit boot sira, ne'ebé uza osan ho polítika hodi hetan buat hotu ne'ebé sira hakarak. Rekonhesimentu formál ba direitu propriedade, husi parte seluk bele benefisia mós maioria populasauun, tanba fó ba famílias ne'ebé kiak ka kbiit laek liu seguransa ba sira atu bele investe iha sira nia rain rasik, dudu sira kuda, soi no harí netik buat ruma. Rai hanesan mós meu ida ne'ebé rikusoin bele transfere ka fó tutan fali husi jersaun ida ba jersaun seluk, tanba ne'e mak garante direitu ba

propriedade signifika katak hametin seguransa jurídika kona-ba transferênsia patrimóniu husi inan-aman ba oan sira. Seguransa katak, kbiit atu fó tutan rai ba jerasoens aban-bain rua nian iha familia ida laran, sei sai hanesan estímulo ka motivasaun ida ba sira atu prezerva ka kuida no bali didi'ak sira nia rikusoin rasik, hodi nune'e bele sustentável ka uza ba tempu ne'ebé naruk.

Buat ida klaru ona, katak bainhira koalia kona-ba kestoens rai ho propiedades, ema timór-oan tomak sei iha sira nia istória rasik atu konta, iha sira nia problema, dúvida no pergunta rasik atu hato'o. Sidadaun ida-ida iha nia repertóriu ka koleasaun kazus ne'ebé envolve kestoens kona-ba rai. Objetivu konsulta públikane'ebé hahú ohin loron, ne'e hakarak duni atu fó ba timór-oan tomak oportunidade atu kontribui, kestiona no fó sujestoens kona-ba anteprojetu ne'e, hodi nune'e lei de- terras ka lei kona-ba rai bele atende di'ak liu ba kazus barak no situasoens oioin ne'ebé bele mosu.

Ita hotu hatene katak elaborasaun anteprojetu ne'e hanesan prosesu ida ke naruk no toda tebes, ne'ebé ezije estudus no peskizas barak ho mós esforsu boot husi parte Ministra Justisa. Ha'u hakarak hato'o ha'u nia parabeins ba Senhora Ministra Justisa no nia ekipa tanba konsege elabora anteprojetu lei ida ke kompleksu no importante tebes no mós lori mai hato'o ba konsulta públika, i ne'e iniciativa ida ke bele favorese lejitimidade no fortalese demokrasia.

Obrigadu.